



12. novembari 2025

Inatsisartut Suleriaasianni § 37, imm. 1 naapertorlugu tulluuttumi apeqqutit Naalakkersuisunut saqqummiuppakka.

Naalakkersuisunut apeqqutit:

1. **Allaffissornikkut suliat soorlu pas-inik nutaannguinerit, kørekortinik tunniussinerit, normupladinik nalunaarsuinerit kiisalu tunniussinerit, innuttaasunullu sullissinerit assingusut politiinit kommuninut tunniunneqarnissaannut periarfissanik misissuinerimik Naalakkersuisut aallartitserusunnerlutik?**
 - a. Suliassat politiitut piginnaasaqarfigisariaqanngitsut, kommuniniillu imaluunniit najukkanni immikkoortortanit allanit isumagineqarsinnaasut suut ullumikkut politiinit suliarineqartarpat?
 - b. Suliassat taamak ittut, inatsisip atuuttup iluani kommuninut tunniunneqarunik inatsisitigut, allaffissornikkullu periarfissat Naalakkersuisut qanoq nalilerpaat?
 - c. Suliassat taakkua kommunit isumagissappatigit pitsaassuseq, assigiissaartumillu innuttaasunut sullissinissaq qanoq qulakkeerneqarsinnaassanersoq Naalakkersuisut nassuiarsinnaavaat?
2. **Suliassat kommuninut tunniunneqassagaluarpata tassunga atatillugu, aningaasalersuinerup suli Naalagaaffeqatigiinnermi oqartussanit isumagineqarnissaa Naalakkersuisut qanoq qulakkeerniarpaat?**
 - a. Kommunit suliassamik tigusissagaluarpata, ullumikkut politiini allaffissornikkut sulianut aningaasat, isumalluutillu atorneqartartut kommuninut ilanngullugit nuunneqarnissaannut aningaasatigit najoqqutassamik suliaqarnissamut Naalakkersuisut suliniuteqassappat?
3. **Politiit maani sulinerat nukittorsarniarlugu suliassat allaanerusumik aaqqissuunneqarsinnaanerit pillugu Justitsministeriaqarfiup, Naalagaaffiullu politiivisa oqaloqatiginissaannut Naalakkersuisut suliniuteqassappat?**
4. **Sammissamut soqutiginarunik allanik Naalakkersuisut paasissutissiisinnaappat?**

(Inatsisartunut ilaasortaq Bo Martinsen, Demokraatit)

Tunngavilersuut

Maani politiit sulerulukkaluttuinnarput. Minnerunngitsumik pisut oqimaatsorpasuit, suliassarpasuiullu politiit qitiusumik suliassaannut toqqaannartumik tunngassuteqanngikkaluartut kingunerisaannik.

Politiit piffissaasa ilaat allaffissornermi suliassanut soorlu pas-inik nutaannguinerit, kørekortinik



tunniussinernut, normupladinik nalunaarsuinernut kiisalu tunniussinernut, innuttaasunullu sullissinernut assingusunut atorneqartarpoq. Suliassat taakkua najukkani kommuninit isumagineqarsinnaagalarput, tamannalu politiit nukitik politiitut, upalungaarsimanermilu suliassaminnut atorsinnaalissagalarpaat.

Taamaakkaluartoq politeqarnermut tunngasoq naalagaaffiup akisussaaffigimmagu, taamaalillunilu aamma naalagaaffimmit aningaasalersorneqarmat, suliassanik taamak ittunik nuutsineq nunatsinnut aningaasatigut annaasaqaataaffiunnginnissaa pingaaruteqarpoq. Taamaalilluni politiit oqilisaaffigineqarnissaannut periarfissat, ilutigisaanillu suliassaqarfinnut taakkunungaa ullumikkut aningaasalersuutit annaaratannnginnissaat paasissallugit apeqquteqaatitigut siunertaavoq.

Apeqquteqaatinnut akissutit piffissaliussap ullut suliffiusut qulit iluini tigunissaat qilanaaraara.